



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

***Sumáriu Kazu
Tribunál Distritál Baucau
Outubru 2014***

**Sumáriu prosesu julgamentu kazu iha Tribunál Distritál Baucau-
Períódu Outubru 2014**

Introdusaun

Iha Outubru 2014, JSMP kontinua hala'ó atividade monitorizasaun ba prosesu julgamentu kazu iha Tribunál Distritál Baucau.

Durante períódu ne'e, JSMP konsege monitoriza kazu hamutuk 40 hosi kazu 53 ne'ebé Tribunál Distritál Baucau julga.

Hosi kazu 40 ne'e kompostu hosi kazu krime ofensa ba integridade fízika simples ho natureza violénsia doméstika hamutuk 15, krime hasoru flora no fauna 1, omisídiu negligente 4, omisídiu negligente no kondusaun sem karta 1, omisídiu simples 1, tentativa omisídiu simples 1, krime ultraze ba simbolu nasional 1, danu simples 2, omisídiu agravadu 1, obstrusaun ba autoridade públiku 1, ofensa ba integridade fízika simples 4, krime ofensa ba integridade fízika agravadu 1, explorasaun ba jogu ilísitu 1, violasaun seksuál 1, krime inséndiu 1, furtu simples 1, danu agravadu 1, ofensa ba integridade fízika simples ho natureza violénsia doméstika, ameasa no danu simples 1 no ofensa ba integridade fízika simples ho natureza violénsia doméstika no krime arma proibida 1.

Entre kazu 40 ne'e, tribunál konklui ona prosesu ba kazu hamutuk 19 no kazu 21 sei iha prosesu nia laran.

Tuir mai deskripsaun sumáriu julgamentu kazu kompletu :

**1. Kazu krime ofensa ba integridade fízika simples ho natureza violénsia doméstika
- Nuc. 0252/12.PDBAU**

Kompozisaun Tribunál : Singulár
Juis : Dr. Jose Goncalves
Ministériu Públiku : Dr. Alfonso Lopez
Defeza : Dr. Horta Ramos
Konkluzaan : Adia

Iha 07 Outubru 2014, Tribunál Distritál Baucau adia prosesu julgamentu ba kazu krime ofensa ba integridade fízika simples ne'ebé diskunfia involve arguidu TFB hasoru CMF nu'udar nia feen. Kazu ne'e akontese iha 23 Maiu 2013, iha Sub-distritu Baucau Vila, Distritu Baucau.

Prosesu julgamentu ne'e adia tanba juis titulár ba prosesu kazu ne'e sei tuir formasaun iha Portugal. Tanba ne'e, tribunál seidauk marka fali data fiksi ba prosesu julgamentu relasiona ho kazu ne'e.

2. Kazu krime hasoru flora no fauna - Nuc. 0981/10.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Alfonso Lopez
Defeza : Dr. Grigório de Lima
Konkluzau : Adia

Iha 07 Outubru 2014, Tribunál Distritál Baucau adia mós prosesu julgamentu ba kazu krime hasoru flora no fauna ne'ebé diskunfia involve arguidu GRdS hasoru Ministériu Agrikultura no Florestal Distrital Baucau. Kazu ne'e akontese iha 23 Outubru 2009 iha Sub-distritu Vemasse, Distritu Baucau.

Prosesu julgamentu ne'e adia tanba arguidu la marka prezensa maske tribunál notifika ona. Kazu ne'e mós tribunál seidauk marka loron hodi hala'o prosesu julgamentu foun.

3. Kazu krime ofensa ba integridade fízika simples ho natureza violénsia doméstika - Nú. Prosesu : 231/Crm.S/TDB

Kompozisaun Tribunál : Singulár
Juis : Dr. Jose Goncalves
Ministériu Públiku : Dr. Pascasio de Rosa Alves
Defeza : Dr. Grigório de Lima
Konkluzau : Adia

Iha 07 Outubru 2014, Tribunál Distritál Baucau adia prosesu julgamentu ba kazu krime ofensa ba integridade fízika simples ne'ebé diskunfia involve arguidu MM hasoru AS nu'udar nia feen. Kazu ne'e akontese iha 08 Dezembru 2012, iha Sub-distritu Uatulari, Distritu Viqueque.

Prosesu julgamentu ne'e adia tanba juis titulár ba kazu ne'e sei ba tuir formasaun iha Portugal. Hanesan kazu antes, kazu ida ne'e mós tribunál seidauk marka loron hodi hala'o prosesu julgamentu.

4. Kazu krime ofensa ba integridade fízika simples ho natureza violénsia doméstika - Nuc. 0252/12.PDBAU

Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Alfonso Lopez
Defeza : Dr. Horta Ramos
Konkluzau : Adia

Iha 07 Outubru 2014, Tribunál Distritál Baucau mós adia tan julgamentu ba kazu krime ofensa ba integridade fízika simples ne'ebé diskunfia komete hosi arguidu VR hasoru AdC nu'udar nia feen. Kazu ne'e akontese iha 22 Novembru 2011, iha Sub-distritu Tutuwala, Distritu Lautem.

Prosesu ne'e adia tanba parte sira muda tiha ona hosi sira nia hela fatin ba fali fatin seluk (sertidaun negativa) no tribunál la konsege notifika sira.

Tanba razaun ne'e, tribunál seidak marka data foun hodi hala'o prosesu julgamentu ba kazu ida ne'e.

5. Kazu krime omisídiu neglijente – Núc. 0535/11.PDBAU

Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Domingos Barreto
Defeza : Dr. Jonas H.da Costa
Konkluzau : Kondena ho pena prizaun tinan 3 suspende ba tinan 3 plus selu kustu judisiál US\$40.00

Iha 07 Outubru 2014, Tribunál Distritál Baucau julga arguidu ACdC ne'ebé komete krime omisídiu neglijente hasoru matebian AG. Kazu ne'e akontese iha 08 Novembru 2011, iha Tirilolo, Distritu Baucau.

Ministériu Públiku akuza katak iha 08 Novembru 2011, tuku 07:00 kalan, iha rotunda Vila Nova Baucau, arguidu nu'udar kondutor mikrolet mitsubishi ho nú. Matrikula; 30745 TLS, tula lezadu ne'ebé foin sai hosi eskola.

Iha momentu ne'eba, lezadu la bele tuur iha kareta laran tanba pasajeirus hamutuk na'in 6 ona no la fo fatin ba lezadu hodi tuur. Tanba ne'e lezadu hamutuk ho ajudante kareta refere table deit iha odamatan kareta nian. To'o iha área Uma Lima nian, pasajeirus ida hapara kareta no tun. Iha momentu kareta atu arranka fali, derepente deit lezadu nia ulun baku iha airin eletresidade ida no rezulta lezadu monu ba rai no ran sai hosi ulun.

Arguidu hakfodak no tun kedas ba kous lezadu no tula ba kedas ba iha Hospitál Referal Baucau hodi hala'o tratamentu, maibé iha 13 Novembru 2011 lezadu iis-kotu.

Ministériu Públiku akuza arguidu kontra artigu 140 Kódigu Penál kona-ba krime omisídiu negligente.

Iha julgamentu arguidu konfesa no rekoñese faktus ne'ebé haktuir iha akuzasaun ministériu públiku nian. Arguidu deklara katak nia ajuda ona despeza ba família matebian hamutuk US\$1,795.50 no hetan asinatura hosi parte rua. Alende ne'e, arguidu deklara katak nia iha karta kondusaun desde tempu Indonezia no arguidu hanesan kondutor profesional. Iha momentu arguidu hapara kareta ba lezadu, arguidu haruka ona lezadu atu tur tama ba iha kareta laran maibé lezadu rasik lakohi. Lezadu rasik hakarak tabele deit iha odamatan kareta no kauza lezadu monu.

Iha 09 Outubru 2014, tribunál kontinua hala'o prosesu julgamentu ho ajenda rona depoimentu hosi testemuña EAX nu'udar ajudante/*konjak* mikrolet.

Testemuña depoimenta katak nia no matebian tabele hamutuk duni iha kareta nia odamatan. Maibe, antes ne'e, testemuña haruka matebian atu tama ba kareta laran maibé matebian lakohi. Wainhira to'o iha área ida ho naran Uma Lima nia oin testemuña ne'e rona tarutu no wainhira hateke ba liur, nia hare matebian monu ona iha rai.

Depois rona depoimentu hosi testemuña refere, ministériu públiku kontinua ba alegasaun. Iha alegasaun final, ministériu públiku argumenta katak arguidu konfesa no rekoñese faktus sira ne'ebé haktuir ona iha akuzasaun. Tanba ne'e ministériu públiku husu ba tribunál aplika pena tuir artigu 140 Kódigu Penál.

Entretantu defeza, argumenta katak arguidu konfesa faktus no arrepende ninia hahalok. Arguidu mós ajuda ona despeza ba família lezadu nian no arguidu iha oan hamutuk na'in 6. Tanba ne'e, husu ba tribunál atu aplika pena admoestasaun ba arguidu.

Iha 16 Outubru 2014, tribunál konklui prosesu kazu ne'e no kondena arguidu ho pena prizaun tinan 3 suspende ba tinan 3 no selu kustu judisiál US\$40.00 ba arguidu.

6. Kazu krime omisídiu simples – Núc. 2366/14.PDBAU

Kompozisaun Tribunál	: Singulár
Juis	: Dr. Hugo da Cruz Pui
Ministériu Públiku	: Dr. Domingos Barreto
Defeza	: Dr. Grigório de Lima
Konkluzau	: Aplika prizaun preventiva

Iha 07 Outubru 2014, Tribunál Distritál Baucau hala'o prosesu primeiru interogatóriu ba kazu omisídiu simples ne'ebé diskunfia involve arguida LdCN hasoru AG. Kazu ne'e akontese iha 04 Outubru 2014, iha Lalulai - Laga, Distritu Baucau.

Iha proses ne'e, ministériu públiku haktuir katak iha 04 Outubru 2014, maizumenus iha kalan (la hatene loloos oras), PNTL Eskuadra Sub-distritu Laga, simu informasaun hosi funsionáriu ida hosi Sentru Saúde Sagadate katak iha tuku 21:00 kalan, arguida sona mate nia banin mane (AG).

Relasiona ho faktu ne'e, ministériu públiku akuza arguida kontra artigu 138 Kódigu Penál kona-ba omisídiu simples.

Depois rona tiha faktu sira hosi ministériu públiku, tribunál rona fali deklarasaun hosi arguida. Arguida deklarata katak iha momentu ne'eba nia kuiñada ki'ik ida husu masin no masako ba arguida maibé arguida la fo, tanba ne'e arguida nia laen tolok arguida. Rona nia laen tolok nia, nune'e arguida mós tolok fila fali nia banin fetu tanba nia banin sira sempre nega katak nia nunka sosa buat ruma. Arguida nia laen la simu hodi foti kadeira plastik ida baku iha arguida nia ulun to'o kadeira rahun.

Depois arguida nia laen baku arguida, arguida dehan ba ninia banin fetu katak "*Ama hare ona ka lae tan deit masin no masako hau nia laen baku hau hanesan ne'e*".

Depois akontesimentu ne'e arguida foti tudik ida sai ba liur no husu ba nia kuiñada katak hamos ona lis ka lae. Derepente deit nia banin mane (lezadu) mai buti arguida nia kakorok no basa arguida. Iha momentu lezadu buti no basa arguida, arguida nafatin konsentra ba nia laen tanba tauk nia laen kontinua baku nia. Maibe iha momentu ne'eba, arguida nia laen husu ba lezadu atu husik arguida no dehan katak so nia mak bele baku arguida. Depois rona nia oan mane dehan nune'e, lezadu husik tiha arguida.

Tanba tauk, arguida halai ba subar iha nia banin kiik ida ho naran BG nia uma laran no nia banin ne'e xavi metin arguida. La kleur arguida rona nia laen hakilar dehan nia apa mate ona. Depois rona liafuan ne'e, nia banin kiik loke janela no haruka arguida ba salva nia an iha Eskuadra PNTL Laga. Relasiona ho sona mate lezadu, arguida deklarata katak nia la hatene tanba iha momentu ne'eba nia kaer tudik hodi hamos lis.

Iha pedidu ministériu públiku nian, husu ba tribunál atu aplika prizaun preventiva ba arguida atu fasilita prosesu investigasaun no prevene arguida komete tan krime seluk.

Ministériu Públiku alega katak maske arguida rezeita faktu kona-ba sona mate lezadu, maibé momentu iha Eskuadra Polísia arguida rekoñese katak tudik ne'ebé antes ne'e nia kaer mak iha hela lezadu nia isin. Tanba ne'e, ministériu públiku fiar katak arguida mak oho lezadu. Relasiona ho faktu ne'e ministériu públiku akuza arguidu kontra artigu 138 Kódigu Penál kona-ba omisídiu simples.

Entretantu, defeza husu ba tribunál atu aplika deit Termus Identidade Rezidencia (TIR) ba arguida tanba arguida deklara katak la'os nia mak sona lezadu. Defeza mós argumenta katak tuir loloos arguida iha problema ho nia laen la'os ho banin mane ka lezadu.

Depois rona pozisaun ministériu públiku no defeza, tribunál suspende tiha prosesu julgamentu durante minutu 15 hodi fo tempu ba tribunál prepara despaxu ba kazu ne'e. Liu tiha minutu 15, tribunál konklui no aplika medida koasaun ho forma prizaun preventiva ba arguida.

7. Kazu krime omisídiu negligente - Nuc. 0148/12.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Alfonso Lopez
Defeza : Dr. Americo Luis Freitas Belo
Konkluzau : Adia

Iha 09 Outubru 2014, Tribunál Distritál Baucau adia prosesu julgamentu ba kazu krime omisídiu negligente ne'ebé diskunfia komete hosi arguidu JM hasoru UF.

Kazu ne'e akontese iha 12 Marsu 2012, iha Vila Antiga Bahu, Sub-distritu Baucau Vila, Distritu Baucau.

Prosesu julgamentu adia tanba arguidu la hetan notifikasaun hosi tribunál tanba sira muda tiha ona ba fatin seluk (sertidaun negativa). Tanba ne'e, tribunál marka fila fali prosesu julgamentu ba iha 23 Abri 2015, tuku 10:00 dader.

8. Kazu krime ultraze ba simbolu nasional – Núc. 0142/11.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Domingos Barreto
Defeza : Dr. Jonas H. da Costa
Konkluzau : Omologu prosesu no absolve arguidu

Iha 09 Outubru 2014, Tribunál Distritál Baucau julga arguidu TMB ne'ebé komete krime ultraze ba simbolu nasional hasoru Estadu RDTL. Kazu ne'e akontese iha 12 Feveireiru 2011, iha *rumah merah* Watulete Baucau Vila, Distritu Baucau.

Ministériu Públiku akuza katak arguidu hanesan veteranus hela iha sede veteranus *rumah Merah Baucau* durante tinan 13 ona. Durante hela iha ne'eba, arguidu mak responsavel hodi hasae no hatun bandeira RDTL. Iha 12 Feveireiru 2011, iha tuku 08:00 dader, hanesan bain-bain arguidu hasae bandeira nasional maibé bandeira ne'e nia marka fitun mai fali ninin. Tanba ne'e konsidera katak arguidu la respeita bandeira nasional.

Ministériu Públiku akuza arguidu kontra artigu 206 Kódigu Penál kona-ba krime ultraze ba simbolu nasional.

Iha audiensia julgamentu arguidu deklara katak akuzasaun hosi ministériu públiku ne'e loos hotu. Arguidu hatutan katak iha 11 Feveireiru 2014 iha udan no anin bo'ot tanba ne'e tali hodi kesi bandeira kotu tiha. Maibé iha kalan ne'e kedas arguidu suku fila fali tali refere.

Iha 12 Feveireiru 2014, iha tuku 08:00 dader, arguidu hasae bandeira refere maibé iha oras meudia polísia hare tali kesi refere la suku iha parte mean besik fitun maibé iha fali parte metan. Arguidu mós deklara katak kazu hanesan ne'e foin akontese durante tinan 13.

Iha nia alegasaun finál, ministériu públiku husu ba tribunál atu aplika pena prizaun tinan 1 suspende ba tinan 1 tanba kazu ne'e foin primeira-ves akontese iha arguidu nia vida. Aleinde ne'e arguidu mós konfesa ninia hahalok.

Defeza argumenta katak durante arguidu servisu hasae no hatun bandeira durante tinan 13, foin primeira-ves akontese, tanba ne'e husu tribunál aplika pena ne'ebé adekuadu.

Iha 16 Outubru 2014, Tribunál absolve arguidu hosi akuzasaun ministériu públiku nian tanba konsidera katak arguidu laiha intensaun atu hasae bandeira ho kontrariu hanesan ne'e.

9. Kazu krime omisídiu negligente – Núc. 0285/13.PDBAU

Kompozisaun tribunál : Singulár

Juis : Dr. Antonio Fonseca

Ministériu Públiku : Dr. Luis Hernani Rangel da Cruz

Defeza : Dr. Juvinal Yanes

Konkluzau : Kondena ho pena prizaun tinan 2 fulan 6 suspende ba tinan 3

Iha 09 Outubru 2014, Tribunál Distritál Baucau kondena arguidu Nogerio Marçal de Jesus (funsionáriu CNE) ho pena prizaun tinan 2 fulan 6 suspende ba tinan 3 no selu kustu judisiál US\$40,00; tanba provadu komete krime omisídiu negligente hasoru Rofina de Sousa (matebian). Kazu ne'e akontese iha 13 Jullu 2013, iha Behali - Distritu Manatuto.

Aleinde pena refere, tribunál mós kondena pena asesoria ba arguidu durante tinan 1 fulan 6 arguidu atu labele kondus motor no kareta. Tribunál mós sita arguidu nia karta kondusaun to'o tempu pena asesoria remata.

Tribunál prova katak arguidu soke duni lezada no rezulta lezada mate iha Hospital Nasionál Guido Valadares (HNGV) hanesan haktuir iha akuzasaun ministériu públiku. Alende ne'e arguidu mós reforsa katak nia ajuda ona família matebian ho karau 2, bibi 2, kafe masin midar, foos no osan US\$4000,00.

Antes ne'e ministériu públiku akuza katak iha 13 Jullu 2013, maizumenus iha oras tuku 07:00 dader, lezada sae bis SUN FLOWER hosi Venilale mai Dili atu fa'an modo. Iha área Be-Hali, Distritu Manatuto, bis refere para hodi deskansa. Momentu bis para, lezada tun hosi bis no liuhosi kareta kotuk atu korta/hakat ba estrada sorin maibé derepente arguidu ho motor vixon ho nu. matrikula 3939 mai husi diresaun Dili ho velocidade makas no soke lezada.

Asidente ne'e rezulta lezada sofre ulun nakfera. Lezada konsege lori ba hala'o tratamentu iha Hospital Nasionál Guido Valadares (HNGV), maibé la konsege salva lezada nia vida.

Relasiona ho aktu ne'e, ministériu públiku akuza arguidu kontra artigu 140 Kódigu Penál kona-ba omisídiu negligente.

Iha julgamentu arguidu deklara katak iha momentu ne'eba nia tula nia primu ida husi Dili atu ba Venilale. Iha área dalan Be-Hali, maizumenus iha metru 250, arguidu hare ona bis ida para iha parte karuk. Tanba ne'e arguidu hatun velisidade ba iha 40 kilometru/oras, maibé derepente lezada mosu mai husi bis kotuk la'o tama ba iha estrada klaran. Arguidu hare ona lezada maizumenus hosi metru hat maibé arguidu la konsege trava no soke lezada.

Iha alegasaun finál, ministériu públiku mantein akuzasaun tanba apoiu ne'ebé arguidu fo hanesana karau rua, bibi rua, kafe, masin midar, fos no osan US\$4000,00 ne'e la sufsiente. Alegasaun ne'e bazeia ba deklarasaun hosi arguidu ne'ebé rekoñese katak nia mak soke inklui depoimentus hosi testemuña CMdS no ONP katak arguidu duni mak soke metabian Rofina.

Iha parte seluk, defeza husu ba tribunál atu absolve arguidu hosi prosesu tomak. Defeza bazeia ba depoimentus hosi testemuña ONP nu'udar kondutor bis ne'ebé matebian sae katak nia para atu tula ai, la'os atu hatun pasajeirus.

Bazeia ba faktu sira ne'e hotu tribunál konklui prosesu ne'e no kondena arguidu ho pena prizaun tinan 2 fulan 6 suspende ba tinan 3.

10. Kazu krime omisídiu negligente no kondusaun sem karta – Núc. 0210/13.PDBAU

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Luis Hernani Rangel da Cruz
Defeza	: Dr. Horta Ramos
Konkluzau	: Kondena ho pena multa US\$ 120,00 & pena asesoria tinan 1 fulan 6

Iha 10 Outubru 2014, Tribunál Distritál Baucau hala'ó prosesu julgamentu ho ajenda leitura sentensa ba kazu krime omisídiu negligente ne'ebé komete hosi arguidu Lorenzo Gusmão hasoru Olandina Assis Belo. Kazu ne'e akontese iha 25 Abril 2013, iha Lutumutu Tirilolo, Distritu Baucau.

Tribunál prova katak iha 25 Abril 2013, tuku 15:00 lorokraik, arguidu kondus motor ida no wainhira to'ó iha Edifisiu Estatística nia oin, arguidu hare lezada korta dalan. Maske arguidu hare ona lezada hosi metru 10 maibé arguidu la konsege trava nia motor, nune'e soke kedas lezada no rezulta monu ba rai no ulun nakfera. Tribunál prova katak aguidu halai ho velocidade kilometru 60 no la laiha karta kondusaun.

Tribunál mós prova katak arguidu ajuda ona família matebian ho osan US\$700.00, hena metan rol ida, foos saka 3, kafe no masin midar, hola kaisaun no aluga ambulansia.

Bazeia ba provas hirak ne'e tribunál konklui prosesu kazu ne'e no kondena arguidu ba krime kondusaun sem karta ho pena multa US\$120,00 ne'ebé kada lora arguidu selu US\$1.00 durante lora 120 no selu kustu judisiál US\$30.00. Tribunál mós aplika pena alternativa durante lora 80 prizaun kuandu arguidu la selu pena multa refere.

Aleinde ne'e tribunál kondena pena asesoria ba arguidu durante tinan 1 fulan 6 arguidu atu labele kondus tantu motor no kareta. Tribunál mós prende arguidu nia karta kondusaun too pena asesoria remata.

Entretantu ba krime omisídiu negligente tribunál kondena arguidu ho pena prizaun tinan 2 suspende ba tinan 2 fulan 6.

Antes ne'e, ministériu públiku akuza arguidu kontra artigu 140 Kódigu Penál kona-ba omisídiu negligente no kontra artigu 207 Kódigu Penál kona-ba kondusaun sem karta.

11. Kazu krime danu simples – Núc. 0262/12.PDBAU

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Alfonso Lopez
Defeza	: Dr. Americo Luis Freitas Belo
Konkluzau	: Kondena ho pena multa US\$45,00

Iha 10 Outubru 2014, Tribunál Distritál Baucau hala'ó prosesu julgamentu ho ajenda leitura sentensa ba arguidu Jerafin Ximenes ne'ebé komete krime danu simples hasoru Agostinho da Costa Belo. Kazu ne'e akontese iha 26 Junu 2012, iha Suku Buibau, Sub-distritu Baucau, Distritu Baucau.

Ministériu Públiku akuza arguidu kontra artigu 258 Kódigu Penál kona-ba danu simples.

Tribunál prova katak iha 26 Juñu 2012, arguidu taa no fa'an tiha lezada nia hudi hun 3. Kada hodi hun ida arguidu fa'an ho folin US\$5.00. Total hamutuk US\$15.00 ba hudi hun 3 refere.

Iha prosesu julgamentu arguidu nega faktus hirak ne'e. Maske nune'e, tribunál konklui prosesu kazu ne'e no kondena arguidu ho pena multa US\$20,00 ne'ebé kada loron sei selu US\$0,50 durante loron 40 no selu kustu judisiál US\$60,00. Tribunál mós aplika pena alternativa durante loron 30 prizaun, kuandu arguidu la selu pena multa refere.

12. Kazu krime obstrusaun ba autoridade públiku - Nuc. 0518/13.PDBAU

Kompozisaun Tribunál : Singulár
Juis : Dr. Hugo da Cruz Pui, Dr. Carlos Filipe no Dr. Antonio Fonseca
Ministeriu Públiku : Dr. Pascasio de Rosa Alves
Defeza : Dr. Grigório de Lima
Konkluzau : Omologu prosesu no absolve arguidu

Iha 10 Outubru 2014, Tribunál Distritál Baucau julga kazu krime obstrusaun ba autoridade públiku ne'ebé komete hosi arguidu AdS hasoru FMT hanesan membru PNTL. Kazu ne'e akontese iha 12 Outubru 2013, iha Waitame – Uatulari, Distritu Viqueque.

Ministériu Públiku akuza katak iha 12 Outubru 2013, maizumenus iha tuku 18:30 lorokraik, iha Eskola Primária Waitame nia oin, sein motivu ruma arguidu foti fatuk tuda dala 3 ba lezadu nia korente motor. Depois arguidu hakbesik ba lezadu no tuku dala 2 iha lezada nia kotuk laran. Iha momentu ne'eba lezadu atu ba servisu (tama kalan).

Ministériu Públiku akuza arguidu kontra artigu 243 Kódigu Penál kona-ba krime obstrusaun ba autoridade públiku.

Iha audiensia julgamentu arguidu konfesa no rekoñese katak nia komete duni krime ne'ebé haktuir iha akuzasaun ministériu públiku no deklara katak iha momentu ne'eba nia lanu hela. Arguidu mós deklara katak nia la hare lezadu tanba rai nakukun. Antes ba tribunál, arguidu no lezadu diak malu ona liu hosi akordu dame.

Entretantu lezadu deklara katak iha momentu ne'eba nia hetan tuda duni dala 3 maibé so dala ida deit mak kona iha korente motor. Tanba hetan tuda, lezadu hapara nia motor no husu tanbasa tuda nia motor, derepente arguidu tuku dala ida iha lezadu nia ruin sorin loos.

Hanesan arguidu nia deklarasaun, lezadu mós konfirma katak sira dame malu ona liuhosi akordu dame tanba arguidu nia aman nu'udar lezadu nia oan sarani.

Iha alegasaun finál, ministériu públiku alega katak mesmu arguidu iha kondisaun lanu maibé arguidu komete krime hasoru lezadu hanesan membru PNTL ne'ebé iha momentu

ne'eba uza farda atu ba servisu. Tanba ne'e husu ba tribunál aplika pena prizaun tinan 2 suspende ba tinan 2.

Entretantu defeza husu ba tribunál atu aplika pena ne'ebé adekuaudu ba arguidu tanba arguidu konfesa faktus, laiha antesidente kriminais no parte rua sei iha relasaun família. Aleinde ne'e arguidu iha ona akordu dame ho lezadu.

Iha 17 Outubru 2014, antes tribunál foti desizaun ba kazu ne'e, tribunál halo alterasaun júridika hosi artigu 243 Kódigu Penál kona-ba krime obstrusaun ba autoridade públiku ne'ebé ministériu públiku akuza hasoru arguidu, ba fali artigu 145 Kódigu Penál kona-ba ofensa ba integridade fízika simples no artigu 258 Kódigu Penál kona-ba krime danu simples.

Depois halo alterasaun jurídika, tribunál omologa prosesu ne'e no absolve arguidu hosi akuzasaun ministériu públiku bazeia ba akordu dame entre arguidu no lezadu.

13. Kazu krime tentativa omisídiu simples – Núc. 0033/14.VQ.VTL

Kompozisaun Tribunál	: Singulár
Juis	: Dr. Hugo da Cruz Pui
Ministériu Públiku	: Dr. Pascasio de Rosa Alves
Defeza	: Dr. Grigório de Lima
Konkluzau	: Aplika Termu Identidade Rezidencia

Iha 10 Outubru 2014, Tribunál Distritál Baucau hala'o prosesu primeiru interrogatóriu ba kazu tentativa omisídiu simples ne'ebé involve arguidu MdS hasoru JdS no ZdS nu'udar arguidu nia oan. Kazu ne'e akontese iha 07 Outubru 2014, iha Babulu, Uatulari, Distritu Viqueque.

Ministeriu Públiku haktuir katak iha 07 Outubru 2014, tuku 12:00 kalan, arguidu sona dala ida iha lezadu JdS nia kotuk laran. Momentu hare lezadu JdS hetan sona, lezadu ZdS tenta atu hadau tiha tudik hosi arguidu nia liman maibé la konsege, nune'e arguidu kontinua sona tan lezadu ZdS iha nia kalilin okos iha parte karuk nian. Kazu ne'e akontese tanba lezadu sira lakohi ba toba iha arguidu nia uma no toba fali iha arguidu nia feton nia uma.

Iha nia prosesu ne'e, ministériu públiku akuza arguidu komete krime omisídiu simples ho forma tentadu tuir artigu iha artigu 138 Kódigu Penál kona-ba omisídiu simples no artigu 23 kona-ba tentativa.

Iha faze primeriu interrogatóriu ne'e, ministériu públiku husu ba tribunál atu aplika prizaun preventiva tanba arguidu komete ona krime tentativa omisídiu simples hasoru nia oan sira.

Entretantu defeza husu ba tribunál aplika medida koasaun ne'ebé adekuaudu tanba arguidu iha prosesu julgamentu arguidu hili direitu nonok.

Depois rona tiha pozisaun hosi ministériu públiku no defeza, tribunál suspende tiha prosesu ne'e durante minutu 15 atu fo tempu ba juis prepara despaxu.

Depois minutu 15 ne'e, tribunál altera akuzasaun ministériu públiku kona-ba krime tentativa omisídiu no propoin fali artigu 146 Kódigu Penál kona-ba krime ofensa ba integridade fízika agravadu.

Bazeia ba prosesu hirak ne'e, tribunál aplika TIR (Termu Identidade Rezidencia) no husu ba arguidu atu periodikamente apresenta an iha estasaun polísia iha kada loron Segunda, tuku 09:00 dader no tuku 17:00 lorokraik.

14 Kazu krime ofensa ba integridade fízika simples – Núc. 3050//10.PDBAU

Kompozisaun Tribunál	: Singulár
Juis	: Dr. Hugo da Cruz Pui
Ministériu Públiku	: Dr. Alfonso Lopez
Defeza	: Dr. Americo Luis Freitas Belo
Konkluzau	: Omologu prosesu no absolve arguidu

Iha 13 Outubru 2014, Tribunál Distritál Baucau prezide julgamentu tentativa konsiliaun ba kazu krime ofensa ba integridade fízika simples ne'ebé involve arguidu Rozito Antonio hasoru Luis da Costa, Manuel Basilio no Floriano Magno da Costa Belo. Kazu ne'e akontese iha 23 Outubru 2010, iha Bahu, Distritu Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Liuhosi tentativa konsiliaun ne'e arguidu rekoñese nia sala no husu diskulpa ba lezadu sira. Tanba arguidu no lezadu sira sei iha relasaun família, nune'e lezadu sira hakarak deziste tiha prosesu kazu ne'e. Bazeia pedidu dezistencia ne'e, tribunál omologa prosesu ne'e no absolve arguidu hosi akuzasaun ministériu públiku.

15. Kazu krime ofensa ba integridade fízika simples ho natureza violénsia doméstika - Nuc.0172/14.PDBAU

Kompozisaun Tribunál	: Singulár
Juis	: Dr. Hugo da Cruz Pui
Ministériu Públiku	: Dr. Domingos Barreto
Defeza	: Dr. Americo Luis Freitas Belo
Konkluzau	: Adia

Iha 14 Outubru 2014, Tribunál Distritál Baucau adia prosesu julgamentu ba kazu krime ofensa ba integridade fízika simples ne'ebé diskunfia komete hosi arguidu JdSN hasoru AX

nu'udar nia feen. Kazu ne'e akontese iha 11 Marsu 2014, iha Sub-distritu Baucau Vila, Distritu Baucau.

Prosesu julgamentu ne'e adia tanba arguidu muda tiha ona ba fatin seluk (sertidaun negativa), no tribunál la bele notifika arguidu. Relasiona ho impedimentu ne'e, tribunál marka fali prosesu julgamentu ba iha 20 Novembru 2015, tuku 14:00 lorokraik.

16. Kazu krime ofensa ba integridade fízika simples ho natureza violénsia doméstika - Nú. Prosesu : 174/Crm.S/13 TDB

Kompozisaun Tribunál : Singulár
Juis : Dr. Carlos Filipe
Ministériu Públiku : Dr. Luis Hernani Rangel da Cruz
Defeza : Dr. Jonas H. da Costa
Konkluzau : Kondena ho pena multa US\$360,00

Iha 14 Outubru 2014, Tribunál Distritál Baucau julga kazu krime ofensa ba integridade fízika simples ne'ebé involve arguidu AdC hasoru FFBS nu'udar nia feen. Kazu ne'e akontese iha 21 Janeiru 2011, iha Sub-distritu Viqueque, Distritu Viqueque.

Ministériu Públiku akuza katak iha 21 Janeiru 2011, tuku 12:00 meudia arguidu ho lezada diskute malu tanba arguidu tun ba Dili sempre tula feto seluk. Tanba ne'e lezada nervoza tuda bikan ida kona iha arguidu nia rentoos. Tanba ne'e, arguidu kaer lezada nia liman dada tama ba kuartu laran no baku dala ida iha lezada nia kabas leten no buti lezada nia kakorok.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Nú. 7/2010 kona-ba Lei Kontra Violénsia Doméstika.

Iha audiensia julgamentu arguidu konfesa no rekoñese faktus ne'ebé ministériu públiku akuza hasoru nia.

Iha alegasaun finál, ministériu públiku husu ba tribunál atu aplika pena prizaun tinan 1 suspende ba tinan 2 tanba arguidu komete krime ne'e tanba hetan provokasaun hosi lezada.

Entretantu defeza husu ba tribunál atu aplika pena ne'ebé adekua ba arguidu tanba arguidu konfesa no rekoñese ninia hahalok, arguidu laiha antesidente kriminais no sira dame malu ona.

Depois avalia faktus sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$360,00 ne'ebé sei selu US\$4,00 kada laron durante laron 90 no selu kustu judisiál US\$40.00. Tribunál mós aplika pena alternativa durante laron 90 prizaun kuandu arguidu la selu pena multa refere.

17. Kazu krimi ofensa ba integridade fízika simples – Núc. 0531//12.PDBAU

Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Alfonso Lopez
Defeza : Dr. Mujariah
Konkluzau : Omologu

Iha 15 Outubru 2014, Tribunál Distritál Baucau halo tentativa konsiliaun ba kazu krime ofensa ba integridade fízika simples ne'ebé komete hosi arguidu Januario da Silva no Mario Abreu da Silva hasoru Luis da Silva no Pedro Celestino da Silva. Kazu ne'e akontese iha 13 Setembru 2013, iha Suku Bukoli, Distritu Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Iha prosesu konsiliaun ne'e, arguidu sira konfesa sira ninia hahalok no husu diskulpa ba lezadu sira.

Antes ne'e mós, parte rua dame malu ona no tanba sira sei iha relasaun família. Tanba ne'e lezadu sira hakarak deziste tiha prosesu ne'e. Bazeia ba akordu no pedidu dezistencia hosi parte sira, tribunál omologu prosesu ne'e no absolve arguidu sira.

18. Kazu krime danu simples - Nuc. 0224/12.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Domingos Barreto
Defeza : Dr. Grigório de Lima
Konkluzau : Adia

Iha 16 Outubru 2014, Tribunál Distritál Baucau adia prosesu julgamentu ba kazu krime danu simples ne'ebé involve arguidu JE hasoru Eskola Ensino Baziku Aiteas Manatuto. Kazu ne'e akontese iha 19 Dezembru 2012, iha Suku Aiteas, Manatuto Vila.

Prosesu julgamentu ne'e adia tanba tribunál la notifika arguidu ne'ebé muda ona nia hela fatin (sertidaun negativa). Tanba impedimentu ne'e, tribunál seidauk marka loron hodi hala'o prosesu julgamentu ba kazu ida ne'e.

19. Kazu krime ofensa ba integridade fízika simples ho natureza violénsia doméstika - Nuc. 0180/14.PDBAU

Kompozisaun Tribunál : Singulár
Juis : Dr. Hugo da Cruz Pui

Ministériu Públiku : Dr. Domingos Barreto
Defeza : Dr. Jonas Henrique da Costa
Konkluzau : Sei kontinua prosesu

Iha 16 Outubru 2014, Tribunál Distritál Baucau hala'ó prosesu julgamentu ba kazu krime ofensa ba integridade fízika simples ne'ebé involve arguidu GS hasoru MFdC nu'udar nia feen. Kazu ne'e akontese iha 20 Janeiru 2014, iha Baucau Vila.

Ministériu Públiku akuza katak iha 20 Feveireiru 2014, iha tuku 08:00 dader arguidu husu osan ba lezada atu selu sira nia oan ninia eskola maibé lezada la fo osan. Tanba ne'e arguidu nervozu hodi basa dala ida iha lezada nia hasan no tebe dala ida iha lezada nia isin to'ó lezada monu ba rai.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese ninia hahalok no deklarata katak iha momentu ne'ebá nia husu osan ba lezada atu selu oan nia osan semester iha UNPAZ–Dili maibé lezada hatan katak osan laiha ona. Tanba ne'e mak provoka arguidu nervozu hodi baku lezada.

Entretantu lezada konfirma katak nia hetan baku duni hanesan haktuir iha akuzasaun ministériu públiku no konsege hala'ó tratamentu iha ospitál no simu aimoruk.

Tanba arguidu konfesa ninia hahlok, iha alegasaun finál, ministériu públiku husu ba tribunál atu aplika pena tuir artigu 145 Kódigu Penál ne'ebé nia modura penal to'ó tinan 3 ka multa.

Entretantu parte defeza husu ba tribunál atu aplika pena admoestasaun ba arguidu tanba arguidu konfesa faktu sira ne'ebé akuza ba nia, laiha antesidente kriminais no diak malu ona ho lezada no arguidu mak responsavel ba ekonómia família.

Depois rona tiha alegasaun finál, tribunál marka fali prosesu julgamentu ba iha 23 Outubru 2014, tuku 14:00 lorokraik ho ajenda leitura sentensa.

20. Kazu krime omisídiu negligente – Núc. 2868/10.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Luis Hernani Rangel da Cruz
Defeza : Dr. Grigório de Lima

Konkluziun : Omologu prosesu kazu no absolve arguidu

Iha 16 Outubru 2014, Tribunál Distritál Baucau hala'o prosesu julgamentu ho agenda leitura sentensa ba kazu krime omisídiu negli jente ne'ebé komete hosi arguidu Deolindo Sarmento hasoru matebian Merita Sarmento nu'udar arguidu nia oan. Kazu ne'e akontese iha 29 Novembru 2010, Buanurak Ossu, Distritu Viqueque.

Tribunál prova katak desde tempu Indonezia arguidu rai aimoruk hodi kura kuda no karau wainhira moras. Aimoruk ne'e arguidu rai iha botir kratendine nia laran, falun iha plastik laran no tau tan iha saku ida nia laran no rai iha uma nia kakuluk atu proteze nia oan sira labele hemu aimoruk refere.

Iha 29 Novembru 2010, iha tuku 12:00, arguidu ho nia feen ba taa akar iha sira nia to'os, derepente sira nia oan ida halai tuir sira na'in rua no informa katak lezada mate ona tanba hemu aimoruk ne'eba arguidu subar metin iha kakuluk uma nian.

Testemuña AS nu'udar arguidu nia feen ka lezada nia inan reforsa katak arguidu proteze ona aimoruk ba labarik sira no momentu ne'eba lezada mak hemu rasik aimoruk refere.

Bazeia ba faktu hirak ne'e, tribunál konklui prosesu ne'e no absolve arguidu tanba tribunál la hetan prova sufisiente katak arguidu mak oho ka iha intensaun atu oho lezada

21. Kazu krime omisídiu agravadu - Nuc. 0866/10.PDBAU

Kompozisaun Tribunál : Koletivu
Juis : Dr. Carlos Filipe, Afonso Carmona no Dr. Hugo da C. Pui
Ministériu Públiku : Dr. Domingos Barreto
Defeza : Dr. Grigório de Lima
Konkluziun : Adia

Iha 17 Outubru 2014, Tribunál Distritál Baucau adia prosesu julgamentu ba kazu krime omisídiu agravadu ne'ebé diskunfia involve arguidu JG hasoru matebian Pedro da Costa Ricardo. Kazu ne'e akontese iha 27 Agostu 2010, iha Laifai, Distritu Lautem.

Prosesu julgamentu ne'e adia tanba juis presidente ba prosesu ne'e foin mak simu despasu ba kazu ne'e. Tanba ne'e tribunál adia prosesu julgamentu ba fali iha 25, 29 Janeiru no 05 no 12 Fevereriu 2015, ho agenda rona deklarasaun hosi arguidu, depoimentu testemuña sira no alegasaun final.

22. Kazu krime ofensa ba integridade física simples– Núc. 0127/14.PDBAU

Kompozisaun Tribunál : Singulár
Juis : Dr. Carlos Filipe
Ministériu Públiku : Dr. Pascasio de Rosa alves

Defeza : Dr. Jonas H. da Costa
Konkluzau : Omologa

Iha 20 Outubru 2014, Tribunál Distritál Baucau halo tentativa konsiliaun ba kazu krime ofensa ba integridade fízika simples ne'ebé komete hosi arguidu Deolindo A. Gonzaga hasoru Graciano Desa nu'udar nia aman hakiak. Kazu ne'e akontese iha 14 Feveireiru 2013, iha Suku Kaibada, Distritu Baucau.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Tanba antes ne'e, parte rua dame malu ona, nune'e tribunál husu atu arguidu dala ida tan husu diskulpa ba lezadu iha tribunál nia oin. Depoisde arguidu husu diskulpa, lezadu deziste kedas kazu ne'e no tribunál omologa prosesu refere no absolve arguidu.

23. Kazu krime ofensa ba integridade fízika simples ho natureza violénsia doméstika - Nuc. 0223/14.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Sei kontinua prosesu

Iha 20 Outubru 2014, Tribunál Distritál Baucau hala'o prosesu julgamentu ba kazu krime ofensa ba integridade fízika simples ne'ebé komete hosi arguidu AJVB hasoru LMFB nu'udar arguidu nia feen. Kazu ne'e akontese iha 19 Marsu 2014, iha Baucau Vila.

Ministériu Públiku akuza arguidu katak iha 19 Marsu 2014, iha tuku 01:00 madrugada, wainhira lezada ba haris fatin atu soe be, sira nia oan hakfodak no tanis. Momentu sira nia oan tanis, lezada husu ba arguidu atu kaer netik labarik nia liman atu nune'e labarik la tanis maibé arguidu hatan ba lezada katak "*hau mak atu fo susu ka?*". Tanba ne'e lezada ba dada tun tiha arguidu hosi kama leten. Arguidu hader no tuku dala hát iha lezada nia ulun, tuku dala lima iha lezada nia kotuk laran no kontinua kaer lezada nia fuk rasta sai ba liur.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese ninia hahalok no deklarata katak iha momentu ne'eba nia matan dukur no derepente lezada ba dada nia tun hosi kama leten. Tanba ne'e mak arguidu nervozu hodi tuku lezada no rasta lezada nia fuk sai ba liur.

Alende ne'e, lezada deklara katak arguidu komete duni krime hanesan haktuir iha akuzasaun ministériu públiku. Depoisde akontesementu ne'e, lezada konsege hala'o tratamentu iha ospital no hela tiha iha Uma Paz Baucau durante semana ida.

Iha 19 Agostu 2014, depois fila hosi Uma Paz, arguidu kontinua baku tan lezada. Iha 20 Agostu 2014, lezada no sira nia oan nain neen ba hela tiha iha lezada nia inan aman iha Berkoli Venilale.

Testemuna MICdS nu'udar arguidu nia feen segundu ne'ebé mós hela hamutuk ho arguidu hili direitu nonok.

Tanba arguidu konfesa faktus nune'e iha alegasaun final, ministériu públiku husu ba tribunál atu aplika pena prizaun fulan 6 suspende ba tinan 1 ba arguidu.

Defeza husu ba tribunál aplika pena ne'ebé adekuaudu tanba arguidu konfesa no rekoñese faktus ne'ebé haktuir iha akuzasaun ministériu públiku.

Depoisde rona tiha alegasaun final, tribunál marka ba iha 05 Novembru 2014, tuku 14:00 lorokraik ho ajenda desizaun final.

24. Kazu krime ofensa ba integridade fízika agravadu--Nu. Prosesu: 332/Crm.C/13.TDB

Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Alfonso Lopez
Defeza : Dr. Grigório de Lima
Konkluzau : Adia

Iha 21 Outubru 2014, Tribunál Distritál Baucau adia prosesu julgamentu ba kazu krime ofensa ba integridade fízika agravadu ne'ebé diskunfia involve arguidu JC hasoru JdC. Kazu ne'e akontese iha 16 Juñu 2012, iha Suku Saelari, Sub-distritu Laga, Distritu Baucau.

Prosesu julgamentu ne'e adia tanba juis titulár ba kazu ne'e iha orariu ba hala'o julgamentu movel iha Distritu Manatuto. Tanba impedimentu ne'e, tribunál adia fali prosesu julgamentu ba iha 10 Fevereiru 2015, tuku 10:00 dader.

25. Kazu krime explorasaun ba jogu ilísitu - Nuc. 0005/13.PDBAU

Kompozisaun Tribunál : Singulár
Juis : Dr. Afonso Carmona
Ministériu Públiku : Dr. Luis Hernani Rangel da Cruz

Defeza : Dr. Jonas Henrique da Costa
Konkluzau : Adia

Iha 21 Outubru 2014, Tribunál Distritál Baucau adia prosesu julgamentu ba kazu krime explorasau ba jogu ilísitu ne'ebé diskunfia involve arguidu EFM, iha 02 Feveireiru 2010, iha Merkadu Vila Nova, Distritu Baucau.

Hanesan kazu antes, prosesu julgamentu ne'e adia tanba juis titulár ba prosesu ne'e iha orariu julgamentu movel iha Distritu Manatuto. Tanba impedimentu ne'e tribunál adia prosesu julgamentu ba iha 30 Outubru 2014, tuku 14:00 lorokraik.

26. Kazu krime ofensa ba integridade fízika simples ho natureza violénsia doméstika – Núc. 0526/13.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena ho pena multa US\$30,00

Iha 21 Outubru 2014, Tribunál Distritál Baucau hala'o prosesu julgamentu ho ajenda leitura sentensa ba kazu krime ofensa ba integridade fízika simples ne'ebe komete hosi arguidu EX hasoru EdS nu'udar nia feen. Kazu ne'e akontese iha 22 Novembru 2013, iha Wailili, Distritu Baucau.

Tribunál prova katak arguidu basa dala ida iha lezada nia hasan no arguidu lori nia liman sikun fai dala hát iha lezada nia kotuk laran. Kazu ne'e akontese tanba lezada ba joga karta no fila mai uma kalan bo'ot.

Durante julgamentu, arguidu konfesa no arrepende ninia hahalok nomós arguidu laiha antesidente kriminais no diak malu ona ho lezada.

Bazeia ba faktu hirak ne'e tribunál konklui prosesu no kondena arguidu ho pena multa US\$30,00 ne'ebé sei selu US\$0,50 kada loron durante loron 60. Alende ne'e, tribunál mós aplika pena alternativa durante loron 40 iha prizaun kuandu arguidu la selu pena multa refere.

Antes ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Nú.7/2010 kona-ba Lei Kontra Violénsia Doméstika.

27. Kazu krime violasaun seksuál - Nuc. 0172/11.PDBAU

Kompozisaun Tribunál : Koletivu

Juis : Dr. Antonio Fonseca, Dr. Hugo da C. Pui no Filipe Carlos
Ministériu Públiku : Dr. Domingos Barreto
Defeza : Dr. Jonas Henrique da Costa
Konkluzau : Sei kontinua prosesu

Iha 22 Outubru 2014, Tribunál Distritál Baucau julga arguidu AMA ne'ebé diskunfia komete krime krime violasaun seksuál hasoru CP nu'udar nia fetu foun. Kazu ne'e akontese iha 17 Marsu 2011, iha Baguia, Distritu Baucau.

Ministériu Públiku akuza arguidu katak iha 17 Marsu 2011, tuku 23:00 kalan, arguidu hamate tiha ahi no tama ba iha lezada nia kuartu laran, taka lezada nia ibun no dada sai lezada ba iha arguidu nia kuartu laran no kontinua halo relasaun seksuál ho lezada. Iha momentu ne'eba arguidu foin fila hosi Lospalos no lakohi han wainhira lezada bolu atu han. Tanba ne'e lezada han hamutuk ho lezada nia oan na'in tolu. Iha momentu ne'eba lezada nia laen ka arguidu nia oan mane servisu hela iha Baucau-Vila.

Ministériu Públiku akuza arguidu kontra artigu 172 Kódigu Penál kona-ba violasaun seksuál.

Iha prosesu julgamentu arguidu deklar katak lezada bolu duni nia atu ba han kalan maibé arguidu dehan katak nia bosu. Arguidu hatutan katak iha oras 23:00 kalan wainhira arguidu tama ba nia kuartu atu toba, lezada ba tuir arguidu iha arguidu nia kuartu hodi empresta osan US\$100,00 ba arguidu hodi sosa telefone maibé arguidu hatan katak nia osan US\$50.00 deit. Arguidu foti osan ne'e iha karteira no entrega ba lezada. Iha tempu hanesan lezada komesa rei arguidu to'o iha ikus sira halo relasaun seksuál. Arguidu hatutan tan katak nia no lezada toba hamutuk to'o iha tuku 05:00 dadersan.

Entretantu lezada deklar katak iha momentu ne'eba nia bolu duni arguidu atu han kalan maibé arguidu lakohi han tanba ne'e lezada ho nia oan sira mak han. Depois han hotu, labarik sira toba no lezada fase bikan maibé derepente arguidu hosi kotuk taka metin lezada nia ibun no dada lezada ba iha arguidu nia kuartu laran no halo relasaun seksuál hasoru lezada. Lezada labele hakilar tanba arguidu buti metin nia ibun.

Lezada hatutan katak arguidu mai hakuak nia hosi kotuk no iha kondisaun molik. Depois halo tiha relasaun seksuál, arguidu ameasa atu lezada labele hateten sai ba ema seluk. Maibé iha dader lezada ba keixa iha xefi aldeia no xefi suku no hosi ne'ebá lezada ba keixa iha Eskuadra PNTL Bagia.

Iha alegasaun finál, ministériu públiku husu ba tribunál atu aplika pena prizaun tinan 8 ba arguidu tanba arguidu deklar katak nia halo duni relasaun seksuál hasoru lezada.

Entretantu defeza husu ba tribunál atu absolve arguidu hosi prosesu tomak tanba arguidu ninia hahalok la prenxe kriteria violasaun seksuál ne'ebé previstu iha artigu 172 Kódigu Penál. Defeza argumentu katak iha momentu ne'eba lezada mak ba iha arguidu nia kuartu laran atu impresta osan no lezada mak hamaus arguidu to'o sira halo relasaun seksuál.

Depoisde rona tiha alegasaun hosi parte sira, tribunál marka fali julgamentu ba iha 06 Novembru 2014, tuku 15:00 lorokraik ho ajenda leitura akordaun.

28. Kazu krime inséndiu - Nuc.1236/10.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Alfonso Lopes
Defeza : Dr. Jonas Henrique da Costa
Konkluzau : Adia

Iha 22 Outubru 2014, Tribunál Distritál Baucau adia prosesu julgamentu ba kazu krime inséndiu ne'ebé diskunfia komete hosi arguidu AAM, LMC, MdC no JdS hasoru lezadu FM. Kazu ne'e akontese iha 28 Juñu 2008, iha Suku Moru, Lospalos, Distritu Lautem.

Maske arguidu AAM, LMC no MdC marka prezensa, tribunál mantein adia prosesu julgamentu tanba arguidu JdS la marka prezensa iha tribunál. Arguidu JdS Tribunál la notifika tanba muda ona nia hela fatin (sertidaun negativa). Tuir informasaun hosi arguidu nain tolu seluk katak arguidu JdS agora daudaun ba servisu ona iha estranjeiru.

Tanba ne'e tribunál adia fali prosesu julgamentu ba iha 06 Maiu 2015, tuku 09:00 dadersan.

29. Kazu krime ofensa ba integridade fízika simples ho natureza violénsia doméstika - Nuc. 0221/14.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Domingos Barreto
Defeza : Dr. Jonas Henrique da Costa
Konkluzau : Sei kontinua prosesu

Iha 22 Outubru 2014, Tribunál Distritál Baucau julga arguidu DSP ne'ebé akuza komete krime ofensa ba integridade fízika simples hasoru JCX nu'udar nia feen. Kazu ne'e akontese iha 14 Marsu 2014, iha Baucau Vila, Distritu Baucau.

Ministériu Públiku akuza katak iha 14 Marsu 2014, iha tuku 10:00 dader, arguidu fila hosi enkontru, lezada husu ba arguidu katak "*ohin imi enkontru koalía kona-b saida?*". Rona

lezada husu hanesan ne'e, arguidu hatan ho tolok. Lezada hakfodak no hateten ba arguidu katak "*hau husu didiak tanba sa o tolok fali?*". Tanba ne'e, arguidu nervozu no tebe dala rua iha lezada nia kidan. Arguidu atu foti besi kanu maibé la konsege tanba SdCP nu'udar sira na'in rua nia oan (testemuña) mak satan netik ka impede tiha aktu ne'e.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha audiensia julgamentu arguidu deklara katak enkontru iha Sede Suku Bukoli iha 13 no 14 Marsu 2014. Relasiona ho kazu arguidu baku lezada ne'e tanba sira nia oan moras, maibe lezada lakohi ba husu lisensa iha sira nia oan ninia eskola.

Iha julgamentu lezada mantein akuzasaun hosi ministériu públiku no deklara katak iha momentu ne'eba arguidu haruka lezada sai hosi uma. Polísia lori lezada ba Uma Paz no hela durante semana ida. Depois fila hosi Uma Paz, lezada no nia oan ki'ik ida ba hela tiha iha nia inan aman sira no oan na'in tolu hela ho arguidu.

Testemuña SdCP ho idade tinan 12, oan hosi arguidu no lezada depoimenta katak iha momentu ne'eba sira nia apa no ama la baku malu maibé histori malu deit.

Iha alegasaun finál, ministériu públiku mantein ninia akuzasaun tuir artigu 145 Kódigu Penál. Enkuantu, defeza husu ba tribunál absolve arguidu husi prosesu tomak tanba bazeia ba testemuña SdCP katak arguidu la baku lezada maibé istori malu deit.

Tribunál marka fali kontinuasaun prosesu julgamentu ba iha 05 Novembru 2014, iha tuku 14:00 lorokraik, ho ajenda rona leitura sentensa.

30. Kazu krime furtu simples - Nuc. 0282/12.PDBAU

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Domingos Barreto
Defeza	: Dr. Jonas Henrique da Costa
Konkluzau	: Adia

Iha 24 Outubru 2014, Tribunál Distritál Baucau adia prosesu julgamentu ba kazu krime furtu simples ne'ebé diskunfia involve arguidu MSG no AS hasoru DAG. Kazu ne'e akontese iha 29 Novembru 2011, iha Venilale, Distritu Baucau.

Prosesu julgamentu ne'e adia tanba arguidu no testemuña muda ona sira nia hela fatin (sertidaun negativa) no tanba ne'e tribunál la bele notifika sira. Ho razaun hirak ne'e, tribunál adia prosesu julgamentu ne'e ba ih 30 Abril 2015, tuku 09:30 dader.

31. Kazu krime danu agravadu - Nuc. 0453/11.PDBAU

Kompozisaun Tribunál : Koletivu

Juis : Dr. Hugo da C. Pui, Dr. Antonio Fonseca no Dr. Afonso Carmona

Ministériu Públiku : Dr. Domingos Barreto

Defeza : Dr. Jonas Henrique da Costa

Konkluzau : Adia

Iha 24 Outubru 2014, Tribunál Distritál Baucau kontinua adia julgamentu ba kazu krime danu agravadu ne'ebé diskunfia involve arguidu MdC, JMdD, FdS, IR, ACdC, OL no PS hasoru VS. Kazu ne'e akontese iha 14 Agostu 2011, iha Suku Luro, Distritu Lautem.

Prosesu julgamentu ne'e adia tanba arguidu sira (FdS no OL) no lezadu muda ona sira nia hela fatin (sertidaun negativa), nune'e tribunál la notifika sira. Tanba ne'e, tribunál adia fali prosesu julgamentu ba iha 03 Jullu 2015, tuku 09:30 dader ho ajenda rona deklarasaun hosi arguidu sira. Alende ne'e, julgamentu tuir mai sei hala'o fali iha 10 Jullu 2015, tuku 09:30 dader ho ajenda rona deklarasaun hosi lezadu.

32. Kazu krime ofensa ba integridade física simples ho natureza violénsia doméstika, ameasa no danu simples - Nuc. 0223/10.PDBAU

Kompozisaun Tribunál : Singulár

Juis : Dr. Antonio Fonseca

Ministériu Públiku : Dr. Domingos Barreto

Defeza : Dr. Juvinal Yanes

Konkluzau : Kondena ho pena prizaun tinan 2 fulan 6

Iha 27 Outubru 2014, Tribunál Distritál Baucau liuhosi julgamentu movel iha Eskuadra Jeral PNTL Distritu Lautem, hala'o prosesu julgamentu ba kazu krime ofensa ba integridade física simples, ameasa no danu simples ne'ebé komete hosi arguidu AL hasoru AdSP no DP nu'udar arguidu nia inan-aman. Kazu ne'e akontese iha 07 Abril 2011, iha Luro – Lospalos, Distritu Lautem.

Ministériu Públiku akuza katak iha 07 Abril 2011, arguidu tuku odamatan makas. Tanba nemak AdS (arguidu nia inan) husu tanba-sa mak halo odamatan hanesan ne'e. Arguidu la preukupa no kontinua dudu odamatan kona iha lezada nia rentos no resulta kanek. Iha momentu ne'ebá DP (arguidu nia aman) halo intervensaun ba arguidu ninia hahalok maibé

arguidu nafatin la preukupa no kontinua ameasa atu oho DP. Arguidu foti fatuk hodi tuda dala rua ba DP maibé la kona. Maibé arguidu konsegue baku rahun termo bee nian 1, parabola 1, LMB (sasan parabola) 1 no telefone nokia 1.

Ministériu Públiku akuza arguidu kontra artigu 145 Kódigu Penál kona- ba krime ofensa ba integridade fízika simples, kontra artigu 157 Kódigu Penál kona-ba ameasa no kontra artigu 158 Kódigu Penál kona-ba danu simples konjuga ho artigu 35 Lei Nú.7/2010 Lei Kontra Violénsia Doméstika.

Iha prosesu julgamentu arguidu konfesa no rekoñese katak krime ne'ebé ministériu públiku akuza hasoru nia loos hotu.

Iha parte seluk AdS no DP (lezada/u), kontinua reforsa faktu sira ne'ebé hakerek iha akuzasaun ministériu públiku. AdS (lezada) hatutan tan katak arguidu sempre ameasa bebeik sira. Kona-ba folin sasan ne'ebé mak hetan estragus, lezada deklara katak termo bee nian 1 ho folin US\$12.00, para bola no LMB 1 ho folin US\$180.00 no telefone nokia 1 ho folin US\$ 70.00.

Tanba arguidu konfesa no rekoñese ninia hahalok no total sasan ne'ebé hetan estragus hamutuk US\$262,00, nune'e iha alegasaun finál, ministériu públiku husu ba tribunál atu aplika pena tuir arguidu ninia hahalok.

Entretantu defeza husu ba tribunál atu aplika pena ne'ebé adekuaudu tanba arguidu la nega ninia hahalok hasoru nia inan no aman.

Depoide avalia faktu sira ne'ebé asoiadu ho prosesu ne'e, tribunál prova katak folin sasan ne'ebé arguidu estraga hamutuk US\$262,00.

Aleinde prova faktus hosi akuzasaun hosi ministériu públiku nian, tribunál mós prova katak arguidu iha antesidente kriminais dala rua ba krime ofensa ba integridade fízika simples ho natureza violénsia doméstika hasoru nia inan. Kazu ne'e rejista ho Nú. Prosesu : 14/Crm.S/2011/TDB. Kazu primeiru ne'e tribunál kondena arguidu ho pena prizaun fulan 3 suspende ba fulan 6. Tribunál kondena iha 27 Setembru 2012.

Kazu segundu, arguidu komete krime danu simples kontinua hasoru nia inan. Kazu ne'e tribunál kondena ho pena multa US\$45,00 ne'ebé kada loron arguidu selu US\$0,50 durante loron 90. Kazu ne'e rejista ho Nú. Prosesu : 42/Crm.S/2013/TDB. Tribunál kondena iha 9 Abril 2013.

Bazeia ba provas hirak ne'e, tribunál kondena arguidu ho pena efetivu prizaun tinan 2 fulan 6 no selu kustu judisiál US\$40,00 ba arguidu.

33. Kazu krime ofensa ba integridade fízika simples - Nuc. 2111/10.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Domingos Barreto
Defeza : Dr. Juvinal Yanes
Konkluzau : Omologu prosesu no absolve arguidu

Iha 28 Outubru 2014, Tribunál Distritál Baucau liuhosi julgamentu movel iha Eskudra PNTL Distritu Lautem, hala'o prosesu julgamentu ba kazu krime ofensa ba integridade fízika simples ne'ebe involve arguidu Johanes do Santos no Olivio da Costa hasoru Mariano Hornai. Kazu ne'e akontese iha 06 Marsu 2009, Lospalos, Distritu Lautem.

Ministériu Públiku akuza katak iha 06 Marsu 2009, tuku 10:00 dader, arguidu sira hamutuk ho ema barak lori ai dona no samurai, ba iha lezadu nia uma. Arguidu Olivio tuku dala rua iha lezadu nia rentos, tuku dala tolu iha ulun no tuku dala rua iha kanuruk. Aleinde ne'e arguidu Johanes dos Santos, tebe dala rua iha lezadu nia hirus matan no tuda ho fatuk dala ida iha lezadu nia ulun to'o hetan kanek. Motivu hosi akontesimentu ne'e tanba odio malu relaciona ho problema ne'ebé akontese iha tinan 2008.

Ministériu Públiku akuza arguidu kontra artigu 145 Kódigu Penál kona- ba krime ofensa ba integridade fízika simples.

Iha prosesu julgamentu arguidu sira hili direitu nonok. Maske nun'e, tribunál husu atu kontinua ba alegasaun finál tanba lezada agora daudaun servisu iha estrageiru.

Iha alegasaun finál, ministériu públiku mantein ninia akuzasaun atu aplika pena tuir artigu 145 Kódigu Penál. Enkuantu, defeza husu ba tribunál atu absolve arguidu sira hosi prosesu ne'e tanba arguidu sira hili direitu nonok.

Depoide avalia faktu sira hotu ne'e partense ba kazu ne'e, tribunál deside atu omologu prosesu ne'e no absolve arguidu hosi prosesu tomak tanba laiha faktus ne'ebé sufisienet atu kondena arguidu sira.

34. Kazu krime ofensa ba integridade fízika simples ho natureza violénsia doméstika – Nuc. 0306/12.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Domingos Bareto

Defeza : Dr. Juvinal Yanes
Konkluzau : Kondena ho pena prizaun fulan 3 suspende batinan 1

Iha 28 Outubru 2014, Tribunál Distritál Baucau liuhosi julgamentu movel iha Eskudra PNTL Distritu Lautem, hala'o prosesu julgamentu ba kazu krime ofensa ba integridade fízika simples ne'ebé komete hosi arguidu VdS hasoru RdS nu'udar nia feen. Kazu ne'e akontese iha 14 Juñu Maiu 2012, iha Lospalos, Distritu Lautem.

Ministériu Públiku akuza katak iha 14 Juñu 2012, iha tuku 08:00 dader; arguidu ho nervozu tuku dala ida iha lezada nia ibun to'o rezulta kanek no bubu. Kazu ne'e akontese tanba lezada ba dansa iha festa to'o dader.

Ministériu Públiku akuza arguidu kontra artigu145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese ba ninia hahalok no deklarata katak nia arrepende nia arepende nia hahalok.

Tanba arguidu konfesa ba ninia hahalok nune'e iha alegasaun finál, ministériu públiku husu ba tribunál atu aplika suspensaun ba pena prizaun ho durasaun tempu naruk atu evita repetisaun hahalok hanesan iha futuru.

Entretantu defeza husu ba tribunál atu aplika pena admoestasaun ba arguidu tanba arguidu konfesa, rekoñese ona ninia hahalok no deklarata katak nia arrepende. Aleinde ne'e to'o agora nunca akontese krime entre sira no arguidu laiha antesidente kriminais.

Bazeia ba faktu sira ne'ebé produs durante julgamentu, tribunál konklui prosesu ne'e no kondena arguidu ho pena prizaun fulan 3 suspende ba tinan 1.

35. Kazu krime ofensa ba integridade fízika simples ho natureza violénsia doméstika - Nuc. 0445/13.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Domingos Barreto
Defeza : Dr. Juvinal Yanes
Konkluzau : Kondena ho pena fulan 3 suspende ba tinan 1

Iha 28 Outubru 2014, Tribunál Distritál Baucau liuhosi julgamentu movel iha Eskudra Jeral PNTL Distritu Lautem, hala'o prosesu julgamentu ba kazu krime ofensa ba integridade fízika simples ne'ebé involve arguidu DG hasoru JG nu'udar arguidu nia oan. Kazu ne'e akontese iha 26 Abril 2013, iha Lospalos, Distritu Lautem.

Ministériu Públiku akuza katak iha 26 Abril 2013, tuku 10:00 dadersan arguidu bolu lezadu atu han maibé lezadu dehan katak nia lakohi han. Tanba ne'e mak arguidu nervozu hodi tebe dala ida iha lezadu nia kotuk laran no basa dala 1 iha kanuruk.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Nú. 07/2010 Lei Kontra Violénsia Doméstika.

Iha prosesu julgamentu arguidu deklara katak nia tebe iha ain no basa dala ida iha lezadu nia konuruk. Tanba arguidu konfesa ba ninia hahalok, nune'e iha alegasaun finál, ministériu públiku husu ba tribunál atu aplika suspensaun ba pena prizaun ho durasaun tempu naruk atu evita repetisaun hahalok hanesan iha futuru. Alende ne'e tanba lezadu sei minoridade ka foin tama ba tinan walu.

Iha parte seluk, defeza husu ba tribunál atu aplika pena multa ba arguidu tanba arguidu konfesa, rekoñese ona ninia hahalok no deklara katak nia arrepende. Arguidu mós laiha antesidente kriminais.

Depoisde avalia faktu sira hotu ne'ebé asosiadu ho kazu ne'e, tribunál kontinua konklui prosesu hodi kondena arguidu ho pena prizaun fulan 3 suspende ba tinan 1.

36. Kazu krime ofensa ba integridade fízika simples ho natureza violencia domestika - Nuc. 0055/12.PDBAU

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Domingos Barreto
Defeza	: Dr. Juvinal Yanes
Konkluzau	: Adia

Iha 28 Outubru 2014, Tribunál Distritál Baucau liuhosi julgamentu movel iha Eskudra Jeral PNTL Distritu Lautem, adia prosesu julgamentu ba kazu krime ofensa ba integridade fízika simples ne'ebé diskunfia involve arguidu JGdC hasoru DM nu'udar nia feen. Kazu ne'e akontese iha 31 Dezembru 2011, iha Lospalos Distritu Lautem.

Prosesu julgamentu ne'e adia tanba arguidu no lezada muda ona sira nia hela fatin (sertidaun negativa), nune'e tribunál la bele notifika sira. Tribunál adia fali prosesu julgamentu ba iha 11 Dezembru 2014, tuku 14:30 lorokraik.

37. Kazu krime ofensa ba integridade fízika simplis ho natureza violénsia doméstika no krime arma proibida - Nuc. 0135/13.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Domingos Bareto
Defeza : Dr. Juvinal Yanes
Konkluzau : Kondena pena fulan 8 suspende ba tinan
1 ba krime ofensa ba integridade fízika simples no absolve
krime arma proibida.

Iha 29 Outubru 2014, Tribunál Distritál Baucau liuhosi julgamentu movel iha Eskudra PNTL Distritu Lautem, hala'o prosesu julgamentu ba kazu krime ofensa ba integridade fízika simples ne'ebé komete hosi arguidu GdS hasoru LdS nu'udar nia feen. Kazu ne'e akontese iha 08 Marsu 2013, iha Lospalos, Distritu Lautem.

Ministériu Públiku akuza katak iha 08 Marsu 2013, iha tuku 16:00 lorokraik, arguidu tuku dala ida iha lezada nia ibun, nune'e lezada halai tiha ba iha nia tiun nia uma. Arguidu foti kilat manu no ba-tuir lezada no tiru dala ida iha lezada nia kelen besik kidan. Aktu ne'e rezulta lezada sofre kanek iha kelen. Kazu ne'e akontese tanba lezada foin fo hatene arguidu kona-ba oan ne'ebé senti moras iha nia hirus-matan. Antes ne'e sira nia oan monu loron lima ona maibé lezada la fo hatene ba arguidu.

Ministériu Públiku akuza arguidu kontra artigu 145 Kódigu Penál kona- ba krime ofensa ba integridade fízika simples konjuga ho artigu 35 Lei Nú. 07/2010 kona-ba Lei Kontra Violénsia Doméstika. Ministériu Públiku mós akuza arguidu kontra artigu 211 Kódigu Penál kona-ba arma proibida.

Iha prosesu julgamentu arguidu deklara katak faktus ne'ebé ministériu públiku akuza ba nia ne'e loos hotu. Arguidu arrende ba ninia hahalok ne'ebé nia komete hasoru nia feen.

Tanba arguidu konfesa ba ninia hahalok nune'e iha alegasaun finál, ministériu públiku husu ba tribunál atu aplika suspensaun ba pena prizaun, nune'e bele eduka arguidu atu la repete tan ninia hahalok ne'e iha futuru.

Entretantu defeza husu ba tribunál atu aplika pena admoestasaun ba arguidu tanba arguidu konfesa, rekoñese ona ninia hahalok no deklara katak nia arrepende. Aleinde ne'e to'o agora nunca akontese krime entre sira no arguidu laiha antesidente kriminais.

Depoide avalia faktu sira ne'ebe produz durante julgamentu, tribunál kondena arguidu ho pena pena prizaun fulan 8 suspende ba tinan 1 ba krime ofensa ba integridade fízika simples no absolve krime arma proibida.

38. Kazu krime ofensa ba integridade fízika simples ho natureza violénsia doméstika - Nuc. 0084/12.PDBAU

Kompozisaun Tribunál	: Singulár
Juis	: Dr. Antonio Fonseca
Ministériu Públiku	: Dr. Domingos Barreto
Defeza	: Dr. Juvinal Yanes
Konkluzau	: Kondena pena úniku tinan 1 fulan 1 prizaun suspende ba tinan 1 fulan 6

Iha 29 Outubru 2014, Tribunál Distritál Baucau liuhosi julgamentu movel iha Eskudra Jeral PNTL Distritu Lautem, hala'o prosesu julgamentu ba kazu krime ofensa ba integridade fízika simples ne'ebé involve arguidu VM hasoru AdS nu'udar nia feen no CM nu'udar nia oan. Kazu ne'e akontese iha 05 Fevereiru 2012, iha Lospalos, Distritu Lautem.

Ministériu Públiku akuza katak iha 05 Fevereiru 2012, iha tuku 06:00 dader, arguidu tebe dala ida iha AdS nia kotuk laran no foti ai baku dala ida iha lezada AdS nia ulun. Kazu ne'e akontese tanba lezada haruka nia oan (lezadu CM) ba kuru bee. Iha tuku 12:00 meudia, arguidu kontinua tebe dala ida no tuku dala ida iha lezada AdS nia kotuk laran no aperta lezada nia kakorok. Alende ne'e, arguidu tebe dala ida iha lezadu CM nia kanotak no baku lezadu CM nia kotuk laran ho ai pedasuk ida.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Nu.7/2010 kona-ba Lei Kontra Violénsia Doméstika.

Iha prosesu julgamentu arguidu konfesa no rekoñese ninia hahalok no deklara katak nia arrepende.

Tuir mai lezada AdS kontinua reforsa faktu sira iha akuzasaun hosi ministériu públiku nian. Enkuantu ba lezadu CM tribunál prezinde tiha no kontinua ba alegasaun finál.

Tanba arguidu konfesa ba ninia hahalok nune'e, iha alegasaun final, ministériu públiku husu ba tribunál atu aplika suspensaun ba pena prizaun ba tempu naruk hodi nune'e bele evita krime violénsia doméstika iha futuru.

Entretantu defeza husu ba tribunál atu aplika pena multa ba arguidu tanba arguidu konfesa, rekoñese ona ninia hahalok no deklara katak nia arrepende. Arguidu mós laiha antesidente kriminais.

Depoisde rona tiha alegasaun hosi parte sira tribunál kontinua kedas ba leitura sentensa. Iha leitura sentensa ne'e tribunál kondena arguidu ho pena prizaun tinan ida tanba provadu komete krime ofensa ba integridade física simples hasoru lezada AdS. Enkuantu ba lezadu CM tribunál kondena arguidu ho pena prizaun fulan 3. Ikus-mai, tribunál aplika pena úniku tinan 1 fulan 1 prizaun suspende ba tinan 1 fulan 6 inklui kondena kustu judisiál US\$40,00 ba arguidu.

**39. Kazu krime ofensa ba integridade física simples ho natureza violénsia doméstika -
Nuc. 0258/13.PDBAU**

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Domingos Barreto
Defeza : Dr. Juvinal Yanes
Konkluzau : Adia

Iha 29 Outubru 2014, Tribunál Distritál Baucau liuhosi julgamentu movel iha Eskudra jeral PNTL Distritu Lautem adia prosesu julgamentu ba kazu krime ofensa ba integridade física simples ne'ebé diskunfia involve arguidu AMC hasoru lezada EF nu'udar nia feen. Kazu ne'e akontese iha 01 Maiu 2013, iha Distritu Lautem.

Prosesu julgamentu ne'e adia tanba arguidu moras fuan no baixa hela iha Hospitál Nasional Guidu Valadares Dili. Tanba be'e, tribunál adia prosesu julgamentu ba fali iha 05 Janeiru 2015, iha tuku 14:00 lorokraik.

**40. Kazu krime ofensa ba integridade física simples ho natureza violénsia doméstika -
Nuc. 0075/13.PDBAU**

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Domingos Barreto
Defeza : Dr. Juvinal Yanes

Konkluziun : Kondena ho pena prizaun fulan 4 suspende ba tinan 1

Iha 30 Outubru 2014, Tribunál Distritál Baucau liuhosi julgamentu movel iha Eskudra Jeral PNTL Distritu Lautem, hala'o prosesu julgamentu ba kazu krime ofensa ba integridade fízika simples ne'ebé involve arguidu EdC hasoru AC nu'udar nia feen. Kazu ne'e akontese iha 20 Dezembru 2012, iha Lospalos, Distritu Lautem.

Ministériu públiku akuza katak iha 20 Dezembru 2012, iha tuku 10:00 dader arguidu no lezada diskuti malu tanba arguidu deskunfia lezada iha relasaun ho mane seluk. Tanba ne'e arguidu tuku dala ida iha lezada nia ulun no tebe dala ida iha lezada nia kanuruk to'o ezada monu ba rai.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Nú. 07/2010 kona-ba Lei Kontra Violénsia Doméstika.

Iha prosesu julgamentu arguidu konfesa no rekoñese ba ninia hahalok no deklarata katak nia arrende ninia hahalok.

Tanba arguidu konfesa ba ninia hahalok nune'e, iha alegasaun finál, ministériu públiku husu ba tribunál atu aplika suspensaun ba pena prizaun ne'ebé bele prevene krime violénsia doméstika.

Defeza husu ba tribunál atu aplika pena admoestasaun ba arguidu tanba arguidu konfesa, rekoñese ona ninia hahalok no deklarata katak nia arrende. Aleinde ne'e to'o agora nunka akontese krime entre sira.

Bazeia prosesu hirak ne'e, tribunál kontinua prezide leitura sentensa no kondena arguidu ho pena prizaun fulan 4 suspende ba tinan 1.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone: 3323883 | 77295795
Website: www.jsmp.tl
Face book: www.facebook.com/timorleste.jsmp
Twitter: @JSMPtl